

SESSIE 2 REFOR-masie

Alhoewel Paulus se ontmoeting met die Here op pad na Damaskus 'n onmiddellike effek op sy lewe gehad het, sou dit hom lank vat om die betekenis daarvan te onderskei. Vandag se sessie handel oor die eerste deel van Paulus se lewe rondom 5 vC – 47 nC, waarin hy sy roeping moes onderskei en waarin sy teologie 'n reformatie ondergaan het. Ons gaan gelyke tyd ook aandag gee aan 'n paar ander belangrike karakters wat in hierdie selfde periode soortgelyke ervarings gehad het wat die vroeë kerk in 'n definitiewe rigting gestuur het.

Vandag se sessie wil ons dus spesifiek laat nadink oor:

- Hoe die Here ons voortdurend verander deur ons teologiese begrip te reformeer. Wat beteken dit dat ek 'n teologie het? Hoe maak as gelowiges se teologie van mekaar verskil?
- Hoe ons in die midde van gebeure en krisis in die kerk en wêreld besig is om God vir ons hede te onderskei.




If you don't listen to theology,
that won't mean you have no
ideas about God, it will mean
you have a lot of wrong ones.

C.S. Lewis

REFORMasie in Paulus se lewe

Ons weet baie min oor Saulus se vroeë lewe. Hy is iewers tussen 5 vC- 5 nC in Tarsus gebore en was van Joodse afkoms. Volgens Filippense 3:5 en Handeling 23:6 was Paulus 'n afstammeling van die stam van Benjamin. In Romeine 16:7



lees ons 'n interessante stukkie rakende naby familielede (Andronikus en Junias) wat voor sy bekering volgeling van Jesus was. Die feit dat hy vroeg in sy lewe Jerusalem toe gestuur was om as Fariseër onderrig te word, is waarskynlik 'n aanduiding van sy intellektuele vermoëns (Handeling 22:3). Die vroegste wat die Bybel van hom melding is by die steniging van Stefanus (c 33/34 nC) (Handeling 7:58). Na afloop van Stefanus se martelaar dood het 'n groot aantal Griekssprekende gelowiges vir hulle lewe uit Jerusalem gevlug, waaronder sommige na Damaskus gevlug.

In sy godsdienstige ywer het hy geroep gevoel om 'n voortvluggende groep Griekse navolgers van Jesus wat hulle in Fenisië, Siprus en Antiogië bevind het agterna te sit, hulle in hegtenis te neem en na Jerusalem terug te bring. Op pad na Damaskus het Saulus 'n ontmoeting met God gehad wat in die volgende teksgedeeltes beskryf word: Handeling 9: 3-6, 22:5-16, 26:12-18 asook

Handeling 9:1-2

Intussen het Saulus soos 'n besetene voortgegaan om die volgeling van die Here met die dood te dreig. Hy het na die hoëpriester toe gegaan en van hom bekendstellingsbriewe aan die sinagoges in Damaskus gevra. Sy doel was om die aanhangers van die leer van die Here wat hy daar kry, mans sowel as vrouens, gevangene te neem en na Jerusalem toe te bring.

Galasiërs. 1:15-16. Let op hoe Paulus se eie weergawe verskil van die storie wat Lukas jare later in Handeling skryf. In Paulus se eie beskrywing heer daar 'n onsekerheid oor wat met hom gebeur het, terwyl Lukas in Handeling eksplisiet noem dat hy geroep was om die Evangelie aan nie-Jode te bring.

Handelinge 9:4-6

Nadat 'n lig uit die hemel op hom geskryf het, het Saulus op die grond neergeval en 'n stem hoor sê: "Saul, Saul, waarom vervolg jy my". "Wie is U, Here?" vra hy toe. "Ek is Jesus", antwoord Hy. "Dit is vir My wat jy vervolg".

Saulus se groot ontugtering

'Ek wonder altyd of die woord 'bekering' regtig beskryf wat hier met hom gebeur het? Saulus was binne die Joodse tradisie gereken as 'n toegewyde gelowige wat reeds van kinderdae af geken het. In

Galasiërs 1:14 beskryf Saulus homself as "'n fanatieke yweraar vir die oorgelewerde leer van my voorvaders". Miskien beskryf die woord "ontugter" beter wat met hom gebeur het. Die teks in Handelinge 9:4-6 is veelseggend. Wat 'n ontugtering moes dit gewees het toe Saulus tot die insig kom dat hy besig was om die Here van sy kinderdae en die Joodse tempel te vervolg! Die volgende paar jaar was vir Paulus 'n tyd van onderskeiding. Hy het tot die insig gekom dat Jesus waarlik die beloofde Messias is, maar dit het tyd geneem om sy gevestigde idees en verwagtinge van God te hersien. In die volgende veertien jaar sou sy teologiese begrip verander soos wat hy praktiese met mense, uitdagings en geleenthede te doen gekry het. Volg die kaart op bladsy 10 vir 'n verloop van die gebeure.

OM OOR NA TE DINK

- Hoe het jou idees en perspektiewe oor God van kinderdae af verander?
 - Watter gebeurtenisse of ervarings het jou gebring om jou eie idees en perspektiewe oor God te verander?
 - Hoe het dit jou 'n beter begrip gegee dat die Here jou op lewe 'n spesifieke manier wil gebruik?
-
- Na sy ontmoeting met die Here vertrek Paulus van Damaskus na Arabië waar hy drie jaar lank bly (Galasiërs 1:16-17). Politieke spanning rakende koning Herodes dwing hom om weer na Damaskus te vlug.
 - In Damaskus deel hy sy insigte met die Joodse gemeenskap en word as gevolg daarvan deur 'n verteenwoordiger van koning Aretas vervolg (2 Korintiërs 11:32-33). Rondom 36/37 nC vlug hy van Damaskus na Jerusalem.

- In Jerusalem spandeer hy twee weke by Petrus. Lees Galasiërs 1:18-20 meer daaroor. Wat dink jy het Petrus en Paulus oor gepraat? 'n Mens neem aan dat Petrus hom meer onderrig het in die gebeure wat die dissipels met Jesus meegemaak het, maar neem ook in ag dat ook Petrus onlangs 'n soortgelyke bekering ondervind het. Ons gaan binnekort meer aandag hieraan gee (Handelinge 10-11).
- Paulus verlaat na twee weke Jerusalem en reis na Sirië en Sicilië (Galasiërs 1:21). In kort is hy terug Tarsus toe waar hy grootgeword het en verdwyn dan vir etlike jare van die toneel. Die eerste keer wat ons weer van hom lees is in Handeling 11:25 toe Barnabas hom daar gaan haal het om saam met hom in Antiogië te bedien (rondom 53 nC). Lees Handeling 11:21-26.

Paulus se bekering, insig en roeping moet samelopend met 'n klomp ander gebeure van die tyd gelees word, waar ander karakters 'n soortgelyke reformatie beleef. Dit bring ons ook by die verhaal van Petrus, Stefanus en die vroeë kerk uit.

- Paulus bevind homself weer 14 jaar na sy ervaring op die pad na Damaskus weer in Jerusalem (47/48) (Galasiërs 2:1-10). Neem in ag dat hy in hierdie tyd al sy eerste sendingreis agter die rug het en reeds duidelikheid gekry het dat sy roeping was om die Evangelie aan nie - Jode te verkondig.
- Handeling 15 was 'n waterskeiding oomblik in die vroeë kerk. Voordat ons daarby uitkom is dit eers weer nodig om dieselfde periode in geskiedenis waartydens Paulus se bekering plaasgevind het vanuit 'n ander hoek te kyk om 'n paar verrassende bewegings raak te sien.

Voortdurend vernuwe vanuit 'n ander perspektief. Die storie van die vroeë kerk

- Lees Petrus se toespraak op Pinksterdag in Handeling 2:14-36.

- Wat is die indruk wat waarmee Petrus ons in sy toespraak laat?
- Wat sou die betekenis wees dat godsdienstige Jode wat vir die Pinksterfees na Jerusalem gereis het skielik in die moedertale van die omgewings waaruit hulle gekom het praat? Ons kry reeds hier 'n baie sterk indikasie dat die impak van Jesus se opstanding veel wyer as die Jode en die tempel strek.

- Die kerk het nie uit 'n model van 'n enkele gemeente (Moedergemeente in Jerusalem) gegroei nie. Die storie van die kerk is die fassinerende verhaal van 'n dinamiese en organiese groei proses waarin daar 'n ryke diversiteit was. Handeling vertel hoofsaaklik die verhaal van die Moedergemeente in Jerusalem (Jode wat in Jerusalem gebly en in Jesus geglo het). Wat het al die Joodse gelowiges geword wat vir die Pinksterfees na Jerusalem gereis het en daarna weer terug is na dele van Asië, Europa en Afrika? Ons lees wel van dat as Paulus tydens sy sendingreise op plekke kom hy reeds op gemeentes afkom wat hy nie gestig het nie.
- Die Joodse gelowiges wat in Jerusalem gebly het, is nie Christene genoem nie. Hulle is deur ander "mense van die weg" genoem en het saam met 'n klomp ander Joodse sektes (Fariseërs, Skrifgeleerdes, Selote) in die tempel God aanbid (Handeling 2:37-5:42). Wat Jesus se navolgers anders gemaak het, was hulle geloof dat Jesus die beloofde Joodse Messias was wat spoedig sou terugkeer om 'n nuwe bedeling te bring vir die Jode (Handeling 2:36).
- Daar was egter mense in hierdie vroeë gemeenskap wat oortuig geraak het dat Jesus se dood en opstanding ook op nie Jode van toepassing is. Die oortuiging het radikale implikasies gehad vir die toekoms van die kerk en het 'n groeiende spanning gebring tussen die Griekssprekende en Hebreeus sprekende deel van die gemeente (twee verskillende wêreldbeelde wat met mekaar bots).
- Die Hebreeus sprekende gelowiges is deur die dissipel groep verteenwoordig, terwyl die Grieks sprekende groep aanklank gevind het by Stefanus se

perspektiewe. Lees Stefanus se toespraak in Handeling 7 en vergelyk dit met die van Petrus in Handeling 2:14-36.

- Stefanus se teologie was deur sommige in die gemeente en breër Joodse gemeenskap gesien as aanval op die Joodse tempel in Jerusalem. Hy is gevolglik as gevolg hiervan deur Joodse gelowiges gestenig, waarna die Griekssprekende deel van die gemeente vervolgt is.
- Terwyl die dissipels en hulle navolgers nog vanweë hulle meer behoudende godsdienstige perspektiewe in die tempel toegelaat is, moes die Griekssprekende deel van die gemeente uit Jerusalem vlug (Lees Handeling 8:1-2).
- Soos wat hierdie groep gevlug het, het hulle die Evangelie verkondig en ons lees dat mense in Samaria tot geloof kom (Handeling 8:5). Petrus en Johannes is gevolglik daarheen gestuur om ondersoek in te stel (Handeling 8:14). Wanneer Saulus se bekering plaasgevind het en in hierdie gebeure inpas is onseker, maar dit was in alle waarskynlikheid in hierdie tyd.

Dit is op hierdie tydstip waar Petrus, soortgelyk aan Paulus se bekering, 'n radikale reformatie van sy geloof ondergaan. Ons lees in Handeling 10-11 daarvan.

Petrus was net so hardkoppig om te aanvaar dat God se genade veel wyer gestrek het as net Joodse gelowiges. Die teks in Handeling 10:34 som dit mooi op.

- Waaroor dink jy het Paulus en Petrus dus met mekaar gepraat toe Paulus volgens Galasiërs 1:18 twee weke by hom in Jerusalem gebly het? Wat dink jy was besig om vir hulle duidelik te word?

Handeling 10:34

Waarlik ek begryp nou eers dat God nie onderskeid maak nie, maar uit enige volk die mense aanneem wat Hom vereer en doen wat reg is.

- Alhoewel Petrus, Paulus en Barnabas dieselfde insig gedeel het in die vernuwende manier waarop die Here in hulle hede werk, het dit groot

spanning tussen hulle en hulle gemeentes gebring. Lees hieroor in Galasiërs 2:11-14.

Wat is die insigte wat hierdie getuïenisse en die verloop van gebeure in die vroeë kerk ons by uitbring?